

路

鍾振翹

角色：樂善——小規模保險公司的其中一個保險經紀，自從車禍後，只要在望著別人時右眼眉調的話，那人就會有血光之災。

美婷——樂善的同事。

四叔——寂寞的老伯，患上惡病。

明理——小規模保險公司老闆，後因破產而一度想跳樓。

酒保——被大耳窿斬死。

有八掛師奶三名。

場景：酒吧、街道、老伯家、保險公司

第一幕：酒吧

（幕開）

（燈亮）

（樂善和美婷坐在桌子旁）

美婷：樂善呀，你入左黎保險公司做左無耐，慣唔慣呀？

樂善：冇乜話慣唔慣既，不過最慘就係到依家都未搵到第一張單…

美婷：唔駛愁，你去買兩支酒番黎，等陣一路飲一路傾，我打個電話先。

樂善：都好。

（美婷拿起手提電話）

（樂善走到 BAR 檯向酒保買酒）

樂善：唔該，俾兩支嘉士伯我丫。

酒保：好呀，等一陣。（轉身拿起兩支酒，遞給樂善）

（樂善伸手接過酒樽，感到右眼眼眉跳了一跳，立即低頭用手按住右眼）

酒保：做乜禁住隻眼呀？吹沙入眼呀？

樂善：冇…冇咩事呀…（話罷隨即轉身離去）

樂善：（再轉頭）你出入要小心 D 呀…記住我講既野呀。（轉身離去）

酒保：你傻架，又有得罪你，好地地叫我睇路都有既。

樂善：（又再轉頭）無論行街睇戲食飯，沖涼刷牙痾屎，總之萬事都要小心呀。
（轉身離去）

酒保：你把口咁臭既，你唔係女人既話我打左你好耐喇！

（樂善走到美婷旁，坐下）

（美婷掛線）

美婷：你咩事呀？做乜買完酒番黎就好似怪怪地咁既？

樂善：（狀似緊張）死喇死喇，頭先我同個 bartender 講野果陣我隻右眼眼眉調
呀，佢今次死梗喇。

美婷：下？咩呀？

樂善：我自從上年撞完車之後，如果一望到人，隻右眼眼眉調既話，咁果個人

唔死都肯定一身傷。就上個月之嘛，我行行下街見到個舊同學，講左有幾句，突然隻右眼又眼眉調，點知過左幾日，就係報紙見到佢撞車死左喇，真係好準架！

美婷：嘩！有冇咁邪呀？

樂善：我都唔想架，總之就係好既唔靈醜既靈啦。

美婷：（笑）哈哈，話時話喇，你對住我果陣有冇眼眉調先？

樂善：咪玩啦，唔係講笑架。

美婷：我都有你咁好氣。

樂善：你唔信我就算啦，過兩日你就知。

美婷：係喇係喇，飲野啦。

（樂善一聲不響，拿起酒樽一嚥飲盡）

（燈滅）

（閉幕）

第二幕：街道

（幕開）

（燈亮）

（樂善和美婷入）

樂善：（狀似鬱悶）美婷呀，你知唔知果日個 **bartender** 有冇俾我講中呀？

美婷：你仲好講！我琴日落 **bar** 見到個 **bartender** 生 **outout** 咁企係度做野，仲鬼咁精神，等你吹水吹都咁大丫拿。

樂善：(突然精神一振) 真係冇事？

美婷：(指著前方) 咦…因乜事前面圍埋咁多人既？

樂善：咪係囉，冇錢執呀？

美婷：過去睇下咯。(拉著樂善走)

(二人行到人群旁)

路人甲：嘩！條友俾人斬到成身血，好核突呀。

路人乙：頭先睇住佢俾幾個大隻佬追斬，肯定係 D 貴利佬追數啦。

路人丙：D 人真係惡呀，斬到血肉模糊，醫番都 o 徒藥費啦。

美婷：咁勁？行人 D 睇下先。

樂善：唔好啦，咁肉酸。

(美婷將樂善硬扯入人群之中)

樂善：(頓)(接著連拍美婷的肩膊) 喂！係佢呀！！

美婷：邊個佢呀？

樂善：我地最近落 BAR 果日我話佢死梗果個 bartender 呀。

美婷：唔係嘛，你講真架？

樂善：呃你做乜喎，死啦，我係唔係又害左一個人呀？之前個舊同學出左事，依家個 bartender 又……(低頭飲泣)

美婷：快 D 走喇，唔好再睇喇。(扯著樂善從人群中出)

樂善：(頓)(呆若木雞) 係喇，一定係因為我呀，係我剋死佢地兩個架，如果我從來都唔識果個舊同學，我就唔會有機會同佢講野，如果果日個 bartender

唔係遇到我…佢今日就唔會俾人追斬…又或者…又或者我剩係左眼先會眼眉調，咁佢地咪會大富大貴囉，又點會一個俾人斬死，一個就俾車車死嗰，一定係我害死佢地架…呀…呀…（奔去街頭，出）

美婷：樂善…樂善！！！（大叫）

（燈滅）

（閉幕）

第三幕：街道

（幕開）

（燈亮）

（樂善入）

（街道上有一名老伯在賣獎券）

樂善：（在街頭萬無目的地亂逛）唉…究竟點樣先可以幫到佢地呢？我又係咪無辦法改變佢地既命運呢？又抑或係我根本做乜都冇用呢？（垂著頭朝著老人那邊方向行過去）

（老人向樂善賣獎券）

老伯：小姐，你個樣咁和善，可唔可以幫我買張獎券呀？

樂善：（抬起頭來）好呀，幾錢一張呀？

老伯：10蚊張呀，多謝嘞…多謝嘞…

樂善：（從袋中拿出銀包）

（感到右眼眼眉跳了一跳）

（樂善鬆開手，手中的銀包掉在地上）

（樂善用右手按住右眼，蹲在地上用左手拾起銀包）

（站起來，雙眼通紅，從銀包拿出 10 元）

（樂善將 10 元遞給老伯）

老伯：你對眼做乜紅晒呀？

樂善：（聲音震斗）冇事呀…真係冇事…

（從老伯手上接過一張獎券）

（繼續往前行，雙手掩著臉頰，激動地放聲大哭起來）

（一會兒，美婷入）

美婷：唉…（喘著氣，撐著腰）原來你係度呀，你頭先去左邊呀？我搵左你好耐喇……

樂善：（停止哭泣） Gillian 呀，你信唔信命架？

美婷：（思索一會兒）我呀…我好信架，好似我咁啦，一出世冇耐老豆就死左…成頭家靠晒阿媽撐住…搞到冇人理我…唉…自己細個果時讀書又唔叻，仲群埋班屋村仔又朝玩到晚，邊度有辦法唔學壞丫…卒之中三都未讀完就出左黎做野，如果唔係駛乜做左咁多年都仲係一個經紀仔姐…所以計我話呢…人一出世果刻就已經冇得揀架喇…乜野都係整定架，順其自然就得啦，所以你睇下我（拍著自己心口）…做人幾開心，幾樂觀，開心又過一日唔開心又過一日…點解唔開心 D 姐？

樂善：（笑）哈哈…都係既。

美婷：笑番就 o 岩喇。

樂善：但係…但係明知人地會出事，都幫唔到佢地，唉…唔知點講呀…總之好似係我間接有份害死佢地啦…

美婷：（疊著樂善的肩膊）唔好咁啦…我以前睇過一本書呀，佢話人呢…就好像一舊俾人放左係山頂既石頭咁…跟著佢俾人一推，舊石頭就輾落山腳，輾下輾下…係果時，舊石頭可以撞到好多野，例如花花草草呀…其他石頭咁…總之…到最後舊石就會停左係山腳既一個地方…靜止唔郁…

樂善：（插嘴）咁係咪即係話人既一生就好像果舊石頭由山頂上面輾落山腳個過程一樣，而到左舊石頭靜止唔郁既時候就係代表人生既終結…

美婷：係醒喎！

樂善：如果照你咁講，舊石頭都真係好無奈…

美婷：點解呀？

樂善：（臉色一沉）因為舊石頭連輾去邊度…撞到 D 乜野都有得揀…

美婷：咁你依家明啦，其實你有冇眼眉調都好啦，佢地咪一樣會出事，你諗下，你只不過係同佢地講左幾句野姐，又有做過 D 乜野，你只係知道佢地將會行既路之嘛，唔關你事架，順其自然啦。

（美婷手提電話響起）

（美婷拿起手提電話接聽）

美婷：喂…係…會落力 D 架喇…係既係既…（美婷關上手提電話）唉…老細又打黎催單喇，真係一世辛苦命…

樂善：（靈機一觸）啊！係喎！點解我諗唔到既？石頭先係冇得揀姐，我地係人黎架嘛，我地仲可以努力架，叫人買保險咪可以幫到人囉，Gillian 呀我突然醒起有 D 野做呀，要走先喇。

美婷：神神化化咁…（看手錶）我都差唔多係時候要去見客，咁遲 D 見啦，Bye Bye。

（美婷出，樂善掉頭走向老伯那方）

（拍拍老伯的肩膊）

（老伯轉身）

樂善：伯伯呀，介唔介意阻你一陣呀？

老伯：（托一托眼鏡，注視著樂善）你係頭先幫我買獎券果個女仔呀，見你咁好心，點會阻我呢？

樂善：你之前有冇買人壽保險呀？

老伯：買保險？邊度得黎有錢供姐。

樂善：唔係咁講喇伯伯，你都一把年紀啦，應該要買定架喇。

老伯：（震怒）你講咩話？你家陣咒我果頭近咁話喇喎，等我仲以為你心地好好，原來心腸咁惡毒！都唔知有冇家教架？

樂善：（耍手擰頭）唔係…當然唔係咁既意思…只不過我覺得你應該為你既將來打算一下姐…

老伯：你都傻既！我都幾十歲人咯，邊樹仲有將來呀？玩下手過多年就瓜老襯啦，仲駛乜買乜野人壽保險？有錢都用黎食餐好啦…

樂善：（插嘴）o 拿！就係呢個 point 喇。

老伯：（不明其意）乜“幫”話？

樂善：即係觀點呀…

老伯：都唔知你 up 乜，唉…（不耐煩）你仲有乜野就快 D 講啦。

樂善：伯伯呀，聽我講啦，當係為左你屋企人，信我，買份保險啦。

老伯：唔買呀唔買呀…過主啦…

樂善：一係我係對面 coffee shop 等你，到你做完野就上你屋企再傾，好冇？

老伯：我都話左唔買咯，你走啦！

樂善：咁最多我幫你俾首期喇！

老伯：（眼睜大）即係唔駛錢？

樂善：冇錯。（點頭）

老伯：唔駛錢就唔驅喇，咁依家拿拿林上我屋企搞掂佢啦。

樂善：好呀。

（燈滅）

（閉幕）

第四幕：老伯家

（幕開）

（燈亮）

（家徒四壁，傢俱簡陋）

（有一個男人臥病在床）

（老伯與樂善入屋）

老伯：坐呢邊啦，隨便得架喇。

（樂善坐在置在中央的餐桌的木凳上）

樂善：咁我依家開始幫你登記你既個人資料（從手袋中拿出筆和申請表），你叫咩名呀？

老伯：我叫劉華，個個街坊都叫我四叔。

樂善：咁你幾年幾月幾日出世架？

四叔：1933 年 12 月 16 號，都成 72 歲人咯。

樂善：咁你個身份証號碼係乜野呀？

四叔：A957603 括弧 7

樂善：你有幾多個屋企人呀？

四叔：我有個老婆，不過係 7 年前已經死左 lu，我老婆以前好靚架，好多有錢佬排住隊追佢，但係唔知點解佢神推鬼槓就跟左我呢個死窮鬼，率之咪捱窮捱死左囉。佢幫我生左兩個女，一個仔，我果兩個女大概係 30 年前嫁左人之後就有再番過黎喇，連信都有一封。o 拿（指著那方），訓係度病到死死下果個咪係我個仔囉（兒子咳嗽聲），佢做左幾年地盤就有肺病喇，點知醫左成 10 年都醫唔番好，咁咪用晒我 D 棺材本囉（又傳來咳嗽聲），唉…都唔知我地邊個死先，我死先既話佢就慘咯，都唔知有邊個照顧佢…

樂善：你唔去搵下你兩個女既？

四叔：有咩好搵丫，生女就預左係蝕本貨架啦，手指咬出唔咬入，仲一去冇回頭，不過生仔又…唉…總之就乜都係整定啦…

樂善：唔…咁你依家做梗乜野呀？

四叔：我好耐之前就整果 D 電子錶既，做左冇耐就去左酒樓做伙記，再之後就乜都做過下咁啦，依家都有做野好耐喇，咪又係靠政府養。

樂善：咁你身體健唔健康呀？

四叔：醫生話我有心臟病架，要定時食藥，不過除左我呢個病，我身體不嬲都好好架，仲日日去晨運添呀。

樂善：咁之後仲有 D 細節野我幫你搞掂佢啦，錢個度你可以放心架喇，我幫你交左錢先啦，再之後既錢就遲 D 再算啦。

四叔：你真係好人喇。

樂善：咁好啦，我都要走喇。

四叔：唔留係度食餐飯？

樂善：唔駛喇。咁如果有問題你就打呢個電話俾我啦。（將名片遞給四叔）

四叔：哦，好啦。

（樂善出）

（燈滅）

（閉幕）

第五幕：保險公司

（幕開）

（燈亮）

（樂善、美婷和一班保險公司職員正在埋頭苦幹）

（美婷走到樂善的案頭）

美婷：你呢排好似搵到好多單喎。

樂善：鬼咩，D單全部都係我幫D客俾錢既。

美婷：下？蝕本生意你都會做既？你傻架？

樂善：咁無理由知道人地就黎出事都唔幫下人架嘛，所以我咪貼埋錢幫佢地買保險囉，咁樣我個心都好過D啦。

美婷：睇下你幾時冇錢開飯。

樂善：哎呀，你咁毒既！

（保險公司老闆明理入）

職員甲：（細聲）喂，你地兩個仲講，大老細上左黎喇。

（美婷立即回到自己的案頭，樂善低下頭假裝勤力工作）

明理：（宣佈）大家停一停先，放低你地手頭上既工作，我有 D 野要同大家講，（眾人抬起頭登起耳朵聆聽）今個月既業績非常之好，其中以蔡樂善同事既成績最彪炳，為左要讚揚同鼓勵呢位咁積極上進既同事，我代表公司頒贈 5 萬蚊獎金俾呢位同事。

（眾人鼓掌）

明理：（指著樂善）你出黎啦。

（樂善走出來）

（從明理手上接過獎金）

（樂善感到右眼眼眉調）

（樂善扮作若無其事，返回自己的案頭）

明理：咁黎梗呢個月大家要繼續努力喇。

（明理出）

（美婷走到樂善的案頭）

美婷：咦，真係好心有好報喎。

樂善：我就好彩姐，大老細就慘喇。

美婷：佢做咩呀？又俾你睇死呀？

樂善：傻啦，關我咩事喎。

美婷：乜咁快睇得咁開呀？

樂善：咁大老細咁有錢，要死既話，我都幫唔到佢 D 乜野啦。

（燈滅）

（閉幕）

第六幕：保險公司

（幕開）

（燈亮）

（公司內亂七八糟、人去樓空）

（樂善入）

樂善：嘩！咩事呀？公司做乜搞成咁架？

（明理衣衫襤褸，精神恍惚，從經理房走出來）

（雙手緊握住很多保單）

（見到樂善，激動起來。）

明理：（指著樂善）係你？你知唔知就係因為你搞到我破產，仲爭人成筆數，而家我跳樓都唔掂呀！

樂善：（頓）我？

明理：（激動）你果 D 客個個都要賠錢，唔係死於非命，就重傷昏迷…總之就賠到最大金額，咁樣唔破產都唔得啦！

樂善：你冷靜 D 聽我講先，我同普通人唔同，我有預知能力架，雖然我唔可以預知天下大事，但係我唯一可以預知既就係感應到一個人就快死，所以我咪搵呢 D 人出黎幫我買保險囉，佢地幫唔到自己，我實在唔忍心眼白白睇住佢地死

呀，我咁樣做都係為左盡我能力去幫佢地，我真係…真係唔知咁樣會累到你架，你原諒我啦，你想我幫你做乜都得架。

明理：你知唔知你咁樣做係用梗我 D 錢去幫人呀！

樂善：（聲音顫抖）對唔住呀…我諗住咁樣可以幫到人架嘛…我真係冇諗過咁樣會變相害左你架。

明理：你道歉又有乜野用呀！你可以俾番 D 錢我咩！（跪地）你累死我喇！我辛辛苦苦先至捱到呢間保險公司番黎，你知唔知我擺左幾多心機落去呀？最近公司先可以上軌道…就係因為你呢個瘟神搞到毀於一旦！冇喇…真係冇喇…

樂善：你仲可以重新黎過架。

（明理慢慢地走向窗邊）

明理：（自言自語）死喇…死喇

樂善：你想做乜呀？唔好做傻事呀！

明理：今次翻唔到身喇…爭左人地幾百萬，點還呀？

（明理坐在窗旁）

明理：個 D 大耳窿實搞我老婆子女架，屋企會俾人淋紅油追數，咁如果我死左既話，咪乜野都解決晒囉…

樂善：天無絕人之路呀，你行番埋黎先啦。（伸手踏前一步）

明理：你唔好行過黎呀！

（樂善退後）

樂善：你都識話你有老婆子女啦，你忍心留低佢地幾個孤伶伶咩？你仲要照顧佢地架嘛，係咪？你番入黎先啦。

明理：（哭泣）我仲邊有能力照顧佢地丫，我唔想成為佢地既負累…唔想佢地要陪住我一齊捱呀…

樂善：人生有咁多條路行，點解你偏偏係要咁傻要揀條死路去行姐？只要你一日唔死，一日都仲有轉機…好多野你都估計唔到架嘛，今日唔知聽日事，話唔定你老婆聽日就中六合彩…等你有錢翻身呢！

明理：你唔好呃我啦，個天整定要我死架喇…

樂善：你又知個天整定要你死？你要相信你自已可以改變命運，唔俾係整定你可以翻身架？

明理：我唔知呀…唔知呀…

樂善：你唔盡過力既話，你又點會知姐？

（明理垂下頭，似有所思。）

樂善：你以前咪又係一無所有，你都係白手興家先至搞成一間保險公司，你依家都可以好似以前咁再努力黎過架。

（樂善慢慢走近明理）

樂善：破產之嘛，香港周街都有人破過產啦，只要捱過四年…就雨過天青架喇…你信我啦，你唔可以放棄架，如果你自已都唔幫自已既話，咁就冇人幫到你架喇，你信我一次啦。

（明理冷靜下來，似乎能被開解）

（樂善再慢慢走近明理）

（樂善伸出手）

（明理亦出手捉緊樂善的手）

（燈滅）

（閉幕）

（全劇完）